

續興安府志

地 170.185
1357
112

咸豐癸丑孟夏

續興安府志

板存來
鹿堂

興安府知府王履亨重刊

續興安府志序

歐陽公見學者多談吏事以爲文章止于潤身政事可以及物余深有味乎其言嘉慶甲子乙丑間余應中丞方公之聘友教青門所接貴游不少嘗得經畧印文一紙因思集元年以來新設文武官吏印文各題以詩裝潢成帙以紀內外大臣經國之識

聖朝除戎不虞之戒丙寅八月寧陝賊起余倉皇歸里霜露夜行得寒疾次年秋九月辭中丞而歸集印之舉不果每檢書見經畧大臣印文未嘗不追念前志也 興安太守葉公健菴曩嘗薦震川于溫方伯又薦震川于方中丞者也交親氣概實爲知己震川病歸之日卽公興安蒞任之時

續興安府志序

公講學論文皆使學者由本及末毋摭我華不食我實論政事如古之善說史漢者靡靡可聽其施於民也務惻隱之實不徒飾文具然敬教勸學修廢舉墜又未嘗不以經術飾吏治治興安四年政和民安人嗟來暮而有續府志之舉書凡八卷安康老友董樸園先生耆德碩學著書滿家公嘗造門咨訪吾友亦辭讓而對不惜傾囊倒篋是書體例一遵前志惟昭忠一篇前志未有固增乎其所不得增義烈一篇小變舊例亦變乎其所不得不變補遺訂訛一卷所關輕重不同卓犖觀者要未可一端或遺也公嘗寄余數金屬購蠶種意甚懇摯旣得種付所賞郭孝子董其事而郡中桑猶可覓未有深解三眠三起停葉駐食之

法者蠶桑須知雖刻印頒示民尙未獲絹繒之利震川深
爲公惜之幸他政絕不類此多有功緒可稽而公之欲然
不自慊則不僅蠶政之寡效已也然明之心余於此益見
而公今膺卓薦恐將擁蓋去此作監郡使者吾不知郡人
去後之思當何如也然則是續也豈僅文字之傳與武功
耀州朝邑高陵諸志比精覈高妙已耶

嘉慶十七年壬申修禊日治愚弟灑城岳震川拜撰

續興安府志叙

興安府志修於乾隆戊申已在由州改府之後
歷年未久續志之舉似非爲政者先務然興郡
負山濱江爲四塞奧區自嘉慶元年白蓮教匪
倡亂以來常依爲遁逃藪遭蹂躪者九載其間
陣亡官兵鄉勇以及臨難捐軀之士民婦女所
在多有又原志所載建置食貨職官諸門繼因
便俗宜民亦多更易皆不可以無傳余於十二

續府志序

三

年冬來守茲土計凱撤甫三四年而稽之故籍
詢之耆舊已多散失無徵况其後耶孝廉董樸
園先生與余爲甲午同年友漢南文獻也舊撰
有讀志脞說一書分刊誤訂訛補遺增封建兵
防外志凡五門余因就咨訪並屬爲續纂體例
一遵原志惟增昭忠節烈兩門缺者補之訛者
正之凡八卷閱期年而成後有作者庶幾彙而
輯之得成完書已乎雖然余尤重有慮焉考前

明州志始於成化戊戌知州鄭福繼之者爲嘉靖丁亥鄭琦萬歷乙未胡天秩又丁巳許爾忠數君子者蓋屢經考訂矣至

國朝康熙丁酉王希舜重修以武進高倬偕先生癸亥所修州志爲藍本按高志云康熙庚寅歲到州得見舊志刻本後壬寅復來求刻本不得止得抄本此卽高志所依據者今不惟舊本不可得並高志亦僅見於樸園同年家良可慨也蓋

續府志序

四

興安山深地瘠民多流移而又隣楚蜀濱漢水歷觀往事不數十年間而或遭兵燹或浸洪波百姓流離遷播故世家大族抱殘守缺者恒鮮其人官斯土者思弭禍患于未形休養生息而饜飫之宜遵何道耶世倬官于茲四年早作夜思求所以善其後而才短政拙迂踈寡效竊深愧沮因以頻年所蒐獲者彙爲此編以備後來考鏡藉補余過此實續志之意非敢漫竄梨棗

也

嘉慶十又七年壬申三月望日興安府知府上
元葉世倬書于玉屏山館

舊序

州志舊叙一

明成化戊戌九月
望日白河縣知縣普暉

夫有道者不爲無益害有益而所爲無不爲道也蓋有所
試矣有若金州統五邑曰洵陽曰平利曰漢陰曰石泉舊
領也惟白河爲新開舊志俱落莫不悉無乃道典有缺與
郡守深州鄭公福首爲此慮以政事繁劇不逮索暉集竟
乃序曰志何爲而作也爲志其形而下者也夫志其形而
下者其山川城池物產貢賦與其公署廟學池亭橋梁寺
觀井泉與抑其溪澗道里鋪舍人物名宦詩文邪蓋兼有
之則形而上者亦在是矣何者蓋山川城池道之流峙樊
衛也廟學公署道之模範觀瞻也寺觀道之虛寂也池亭

舊序

六

道之遊觀也井泉道之源也溪澗道之流也物產貢賦道
之生需也橋梁道里鋪舍人物名宦詩文道之攸寓也道
其形而上者而妙乎形而下者與夫顯微無間尙矣志載
形而下者則形而上者不在是而安在邪然則是志爲無
益者乎雖然守篤志於道者暉瞽行冥趨而索道塗者其
於是惡能有益而副守託耶直據此以爲有道者俟

州志舊序二

明嘉靖丁亥三月
既望知州建業鄭琦

夫先知天下之事而後可以處天下之事况爲守令者不
知一郡一邑之事何以言治哉嘉靖甲申予始至金州其
疆域之遠邇土地之肥磽風俗之淳漓生民之休戚賦役
之重輕與夫古今人物建置沿革舉無所知訪之舊志僉

曰版籍殘缺明年得成化間先守鄭君福刊本因知金州國初下邑四成化時增置白河而紫陽設於正德庚午里亦四成化時增爲十七弘治末增爲二十五未幾析三里於紫陽今實二十二以今視昔不無有缺又明年見風土貢賦人物之日盛藩臬守令設施之繼舉較鄭君時大不侔矣琦忝州牧不續志之可乎爰采衆識付庠生王定之彙次成編夫志以紀載因類附增至田畝惟以起科紀著因土作貢之制也屯田不以軍政畧示兵出於農之法也錄戶口見繁庶現有可徵載徭役見財力不宜盡取表和公王氏之行顯忠節也籍步畝間架之稅備稽考也孝義雖無猶題其目望後人也社倉雖廢猶詳其事存義舉也

舊序

七

以今之有補昔之無以今之詳該昔之畧而志庶幾成矣自茲以還疆域之遠邇知所以保障之土地之肥磽知所以勸課之風俗之淳漓知所以激昂之戶口貢賦人物建置知所以安養法守之豈直爲文具而已哉雖然時勢有隆替風土有變遷習尙有美惡政教有張弛安知今日之所有不爲後日之所無後日之所增不爲今日之所缺乎是有望於後之守茲土者

州志舊序三

明萬曆乙未夏四月朔知州東牟 胡天秩

夫郡邑有志其來尙矣興安在陝東南舊有志癸未漢水之變典籍蕩然則志不可缺亦不可緩矧甲申改金爲興安郡且異名志何可仍舊余奉命涖州甫兩月例當入覲

及旋博訪羣籍商同學正董際訓導袁尙紀周魯採舊志
詢耆獻刪繁就簡釐而序序而類令生員李進等揚以梓
校讐之夫志者一方之實錄也自嘉靖丁亥鄭守琦修刻
抵今未六紀其土田形勝不減也戶口貢賦尤過也而風
俗遠不及嘉靖之世豈真江河之趨不可返乎蓋嘉靖時
其民淳則安於無事故財力培而長厚之道崇今囊橐付
之河伯矣血力委之土木矣民苦荒歉奔疲亡命始說僂
巧以偷生閃避與嘉靖不相及非真民心之過財力竭
勢不得不然耳雖然顧上之所處何如耳吾以勤率俾民
力於耕作吾以儉率俾民甘於節省需之歲月民心雖
必有向風挽轍可回氣運於萬一云

舊序

八

州志舊序四

明萬曆四十五年七月十五日知州許爾志

與之有志創自鄭州守福時則其民淳其俗樸閱四紀
州守琦復有增補時則其民衍其俗裕再四紀有八載
侯肆虐城市爲沼改治更名固窮則變之時也又十載
州守天秩重修時則其民瘠其俗漓緣漂流之餘瘡痍未
瘳時勢然也丙申直隸於省免奔供之繁埒八郡而九休
養生息二十餘年又變則通之時也而瘠也漓也日甚豈
流風逝波不可返耶亦水旱頻仍勞來安集未盡其道耶
忠始至於危觀披縑帶整廣輪千里比卽事百廢蠅集環
矚蒿日思於百姓更始惟無以道體解因取州志閱之庶
幾得其肯綮而舊事不載新事且缺嗟嗟以州之不知何

以治州於是集羣書咨耆宿付學博李正芳編纂之使書
其甚者詳蕪訛者釐正而所守之事若燭照數計儻亦所
謂挈其裘領者乎通變宜民又在設誠而致行耳如日誨
多闕靡忠何敢

州志舊序五

康熙甲子孟春朔旦武進高寄

歲在庚寅門生董巽祥選紫陽知縣邀請同來得見興安
舊志刻本止於明萬曆丁巳自後來往不常壬寅歲復來
求刻本不得止得抄本卽訪問講求刪其蕪鄙更其譌舛
補其闕畧錄成草藁甲寅歲寓平利花櫟岡再加訂正增
入自唐以來名人題咏數百餘首手自楷書携至州城將
謀剞劂明年乙卯元宵兵變倉皇奔避僑寓平陽庚申歲

舊序

九

再來於營丁之家得前所修草藁而楷書善本則杳然不
可問矣州地屢經兵燹文獻無徵於今尤甚而此藁尙存
則猶爲深幸也遂據舊所見聞悉爲增補又得舊鄰朱正
邑送還予昔年所錄詩文藁一部而前人題咏失遺過半
可慨也已訖辛酉春抄謄甫竟自念影逼桑榆志稿未刻
將來經傳所闕匪細卽爲勉力捐刊猶自懼其掛漏後之
闕此者恕其狂瞽加之是正雖一日千秋可矣

州志舊序六

康熙三十四年十一月吉旦知州王希舜

夫志難言也哉興安古金州地叢集萬山中通一水西界
蜀南接楚領屬邑者六其爲幅幘也至廣而僻蓋天下之
奇險也建置以來歷今幾千百年其間時勢之沿革風俗

之盛衰人民之聚散夫亦甚不勝志也哉然而山川無恙疆域依然測之星躔則分野有象也按之版籍則賦役有書也稽之經制則建官有等也且以言典故則學校祀祠有明禮也以言形勝則關隘兵防有設險城郭津梁有界限也以言事物功名則名宦鄉賢人才科目孝義節烈各有流風餘韻也卽或僻壤山陬未乏賢豪之稅駕丹崖翠壁曾留仙佛之遺踪安在鳥獸草木產于水土者不可盡名詩古文辭散於菑死者絕少概見耶此則皆可志也已獨是志也者文法乎古事取乎信與安旣稱奇險變易時聞遷徙莫定且不必遠徵徃代卽如在我

朝車書一統自古絕盛而丙戌間罹山賊之寇虐屠戮者十

舊序

十一

不存一也卯辰間遭逆孽之叛亂竊據者竟延至五六載也癸酉夏值江水之泛漲衝陷者一望幾邱墟也是豈非災異之不常而不可以尋常叙述所能勝志也哉又况故基舊蹟蔓野荒陂去其鄉者亦遂湮沒無稽焉耳此言志於此地難而言修志於此時抑更難也歲乙亥上臺奉

天子命徵通屬志書將以上之

國史而我興安遭屢變之後殊形異勢文獻無徵其何以成百年之盛集而副熙世之采擇也哉因與別駕石君議其事謂夫天下惟爲之難耳夫爲之亦焉有卒難也彼高山大川隱而在下者豈無遊覽之名流者乎豐草長林得諸

邱墳者豈無故老之傳習者乎乃延劉子體元穆子簡臣
並置之館凡以廣蒐博采暮月而後共卒業焉庶幾考古
証今或有裨於信史闕文補義不無望於後賢而已若夫
禮士授餐參互考訂于此志之成有相助爲理者例皆得
書故並列其姓氏於簡端而兼以志其修輯之所由有如
此者於是乎序

續修興安府志目錄

第一卷

疆域志

建置志 城堡 壇廟 公署

第二卷

食貨志 蠲賑 戶口 田賦 課稅 土產

第三卷

職官志

第四卷

學校志

書院志

續興安府志目錄

選舉志

鄉飲志

第五卷

昭忠志

第六卷

義烈志 紀事

第七卷

藝文志

第八卷

補遺 另有目錄

續興安府志第一卷

前志之修安康原統漢陰故疆域諸務皆歸於一自漢陰改撫民昔之合者今又分矣至於城池堡寨繼有興修祀典官衙更多增改皆不可不識也綜斯數者續疆域建置

疆域郡之四履前志已詳茲但以漢陰安康先合後析志其四至八到

漢陰廳東西廣一百十里南北袤四百二十里東至安康界七十里西至石泉界四十里南至紫陽界八十里北至長安界二百里東北至鎮安界一百五十里西南至西鄉界二百里

安康縣東西廣一百七十里南北袤七百里東至洵陽界

續興安府志卷一

六十里西至漢陰界一百一十里北至洵陽界七十里南至四川大寧縣界七百里西北至藍屋縣界五百里西南至紫陽縣界七十五里東南至平利縣界三十里

建置

新城乾隆三十一年知州舒世泰領項重修惟北門并樓仍舊至嘉慶初歷年既多傾圮更甚知府葉世倬於十三年飭安康令王森文估計合舊城一并詳請領項重修至十六年八月告竣新城週圍共湊長六百九十三丈四尺排垛牆一千零九堵高二丈一尺底寬二丈頂寬一丈一尺排垛牆高五尺五寸四門城臺四座正樓四座每座三間三面安炮眼二層四門月城臺四座城

頂周圍炮台八座添建炮臺六座內四城角圓炮臺四座上各添蓋炮樓出水溝二十八道海墘城甃二層四城馬道四座城根添築散水裡五尺外一丈

舊城嘉慶二年冬巡撫秦諱承恩捐銀五千兩從舊寧遠門檀洞甃門就舊基帮補知府周光裕捐貲勸輸相繼接築北藉堤面南依舊根至東關卽南托白龍東就長春北因惠壑于三堤加頂增埤廓爲一城東以朝陽閣爲門西卽寧遠南面爲門三北面爲門四西門南門建樓二惟北通津門仍堤上真武閣未檀洞甃門也嘉慶十三年重修至十六年八月告竣計週圍共湊長一千二百九十三丈六尺排築墻一千七百六十五堵高二

續興安府志卷一

丈二尺至三丈均高二丈六尺頂寬二丈五尺至一丈二尺均寬一丈八尺五寸原作依堤築城高低寬窄不一今城頂添墁城甃二層添築灰土二步正樓四座內大北門本無城臺今改砌城臺一座改建正樓一座餘俱無城樓城臺一律加高五尺城上西北東南二處各添建敵樓一座炮樓一座南北月城二道加高五尺四城角添築炮臺四座又南面二座東南城根有施陳二溝水漲之患今隨城根帮築旱臺計素土寬一丈高五尺又城之東面地勢較低城東舊城墻一道長一百七十七丈八尺五寸歲久殘缺今仍估修墻高二丈六尺頂寬八尺底寬一丈四尺以防水患舊東門左右開小

門二處以便民往來

碣樓嘉慶十五年續估添建趙臺山碣樓一座見方一丈八尺通高二丈七尺從下而上週圍銃眼二層計四十四有六頂安炮眼一層計十有四上排垛牆高五尺五寸平利縣城舊在龍山之陽嘉慶七年經畧大臣諱額勒登保相度形勢以褊窄低窪無險可憑惟白土關當川楚之衝最爲扼要且地勢高爽

奏請移治縣令任奎光依關堡舊基加築外砌石片內築卧牛頂以石灰海墁計高一丈三尺底寬一丈四尺頂寬一丈圍長五百四十八丈五尺女牆八百四十有八高四尺五寸東西南爲門三門建一樓南面外築套城東

續興安府志卷一

三

西各一門門建敵樓一城用土墼砌頂寬八尺用石板海墁油灰塗縫三而共計長二百一十二丈六尺女牆二百二十三連城高一丈七尺內外塘以油灰亦署令任奎光估報領項修

白河縣城乾隆二十三年縣令謝奉璋詳請重修臨水傍山未扼地險嘉慶二年知縣嚴一青因教匪逋竄屢經因於城外天池嶺土地嶺太山嶺北嶺等處隨山勢高下增築外城一千二百九十七丈舊日城垣外高內下今則內高外下地利形勝之得失相去遠矣蓋其自記如此但郭將十里戶僅百餘一旦風鶴守陴實難觀其於稟將軍書內亦自言窘於措置也